

18 APR 2003

Mahathir-Iraq/I

MAHATHIR: AMERIKA DAN BRITAIN BERTANGGUNGJAWAB BINA SEMULA IRAQ

Oleh: Yong Soo Heong dan Mikhail Raj Abdullah

PUTRAJAYA, 18 April (Bernama) -- Amerika Syarikat dan Britain bertanggungjawab untuk membantu memulihkan semula ekonomi Iraq memandangkan kedua-dua negara itulah yang telah memusnahkannya menerusi pencerobohan mereka baru-baru ini, kata Perdana Menteri Datuk Seri Dr Mahathir Mohamad hari ini.

"Mereka tahu bagaimana memusnahkan Iraq, maka mereka juga mesti tahu bagaimana untuk membinanya semula," katanya dalam satu temubual eksklusif dengan Bernama di Seri Perdana di sini hari ini.

Malaysia, katanya, tidak akan terlibat dalam pemulihan semula ekonomi Iraq kecuali menyediakan bantuan seperti makanan dan ubat-ubatan, bantuan perubatan dan mungkin perniagaan.

"Kita (Malaysia) tidak boleh membina semula ekonomi Iraq. Ekonomi mereka telah musnah akibat daripada perikatan antara Amerika Syarikat dan Britain. Jadi, sudah menjadi tanggungjawab negara-negara ini memulihkan kembali ekonomi Iraq," kata Dr Mahathir yang masih lagi bercuti dan baru sahaja pulang dari Amerika Latin dan Jepun.

Dr Mahathir juga berkata yang perang terhadap Iraq adalah tidak perlu.

"Sama ada mereka (tentera bersekutu) menjumpai senjata (pemusnah besar-besaran), perang itu tidak perlu kerana kita tidak percaya membunuh orang ialah cara untuk mengatasi masalah."

"Jika kita percaya dengan membunuh orang sebagai cara mengatasi masalah, maka sudah tentu, negara yang paling berkuasa boleh menyelesaikan masalah mereka dengan begitu mudah iaitu dengan membunuh yang lain," kata beliau merujuk kepada Amerika Syarikat yang telah mengetuai pencerobohan di Iraq pada 20 Mac bersama-sama dengan sekutu terkuatnya, Britain.

Perang itu menyebabkan kematian antara 1,600 dan 1,900 orang awam Iraq. Kira-kira 2,300 tentera Iraq dilaporkan mati di Baghdad sahaja dan dianggarkan 5,100 orang Iraq cedera.

Di pihak Amerika Syarikat pula, 125 askarnya terbunuh manakala kematian di kalangan tentera Britain ialah 30.

Ditanya mengenai tindakan Amerika untuk menyerang Syria kerana disyaki melindungi pengikut-pengikut setia presiden Iraq, Saddam Hussein, Dr Mahathir berkata : "Inilah kononnya apa yang Amerika katakan, perang terhadap keganasan."

"Mereka tidak boleh dapatkan pegganas, maka mereka serang semua negara Islam ini supaya negara-negara Islam ini menjadi takut dan tidak akan membenarkan mana-mana pegganas mendapat sokongan ataupun perlindungan mereka. Itulah caranya mereka mahu melawan."

Dr Mahathir berkata penggunaan kuasa sewenang-wenangnya oleh Amerika Syarikat ialah untuk menunjukkan kepada negara-negara lain yang "mereka kini berurusan dengan sebuah negara yang paling berkuasa yang akan melakukan apa sahaja."

Ini, kata beliau, bermakna yang dunia kini sudah menjadi dunia sepihak di mana "satu kuasa telah menjadi begitu berkuasa lantas menguasai segala-galanya dan kuasa itu tidak malu menggunakan kekerasan untuk mencapai cita-citanya."

"Itulah dunia di mana kita tinggal sekarang, kita kena belajar menerimanya," katanya.

Dr Mahathir berkata malah negara-negara maju seperti Perancis, Jerman dan Rusia turut merasakan tekanan ini. Ketiga-tiga negara ini telah menentang penggunaan kekerasan terhadap Iraq jika ia tidak mendapat

persetujuan Bangsa-bangsa Bersatu.

"Kita telahpun melihat beberapa kelemahan (pendirian mereka) dan ingin "kow-tow" (atau tunduk) kepada negara yang paling berkuasa di dunia," kata beliau.

Dr Mahathir, yang telah berulang kali menyuarakan supaya punca keganasan perlu dikenal pasti bagi menangani masalah itu, telah ditanya mengapa Amerika tidak meyokong saranan beliau itu.

Perdana Menteri, yang sebelum ini berkata mesti ada sebab untuk seseorang itu merempuh kapal terbang ke bangunan atau menjadi pengebom berani mati berkata, Amerika Syarikat tidak pernah terfikir untuk menyelesaikan masalah keganasan dengan merujuk kepada punca sebenarnya.

"Apa yang mereka fikir harus mereka lakukan ialah membelasah kesemua negara ini supaya mereka tidak mempunyai sesiapa menjalankan sebarang aktiviti pengganas kerana jika mereka melakukannya, maka semua negara ini akan ditentang hingga hancur, kerajaan mereka akan ditukar, negara mereka akan diserang. Jika pengganas-pengganas ini membunuh satu orang, mereka bersedia untuk membunuh 1,000," katanya.

Ditanya apakah yang boleh dipelajari negara-negara membangun termasuk Malaysia, daripada tindakan pencerobohan terhadap Iraq, Dr Mahathir berkata mereka perlu belajar lebih berdisiplin dan bekerja kuat memajukan negara masing-masing dan tidak terlalu bergantung kepada yang lain.

-- BERNAMA

SHY MR AA